

- 1★ جموں کشمیر مانہ اسمبلی انتخابات گا ووٹاں غی گنتی با رے تیاریں زوراں ور ہیں۔ تے ات گنتی مرکزوں ور 3 پالی حفاظتی نظام عملایو گیو ہے۔
- 2★ پورا مرکزی زیر انتظام علاقہ جموں کشمیر گا ووٹاں ات پُر امن تے شفاف انتخابات کروان واسطے بھارتیہ چناؤ کمیشن غو شکریو ادا کر ریا ہیں۔
- 3★ قومی تحقیقاتی ایجنسی یعنی این آئی اے غی طرفوں دہشت گردانہ مالی معاونت معاملہ با رے جموں کشمیر سمیت پورا ملک مانہ چھاپہ ماری کی گئی ہے۔
- 4★ تے سابقہ صدر جمہوریہ رام ناتھ کویند نے کہیو ہے جے اک ملک اک چناؤ بیک وقت کروانو وکست بھارت آلے پاسے اک قدم ہے۔

3Tier Security Arrangements

جموں کشمیر گا تمام ضلع صدر مقامات ور منگلواریں ووٹاں غی گنتری کی جائے گی۔ تے اس واسطے حفاظت گا تگڑا انتظامات کیا گیا ہیں۔ یا د رہ جے دفعہ 370 غی منسوخی تیں بعد پہلی وری جموں کشمیر مانہ 90 اسمبلی حلقاں ور مشتمل چنی وی سرکار بنے گی۔ جموں کشمیر پھر مانہ ووٹاں غی گنتری کرن غی خاطر 20 مرکز قائم کیا گیا ہیں۔ جت 3 پالی حفاظتی کیپرو لایو گیو ہے۔ ووٹاں غی گنتری گا مراکز مانہ گنتری واسطے تعینات عملہ غے نال نال چناؤ لڑ ریا امید واراں گا اہل کو ٹیننگ ایجنٹس نانہ جان غی اجازت وے گی۔ تے ان مراکز غے باہر عوامی خطاب نظام، پبلک اڈریس سسٹم ور گنتری گا ہر راؤنڈ تیں بعد ہر امید وار گا ووٹاں غو اعلان کیو جائے گو۔ 90 اسمبلی حلقاں واسطے 8 سو 73 امید واراں غی قسمت غو حتمی اعلان منگلواریں کیو جائے گو۔

Counting Rajouri

راجو ری ضلع گا 5 اسمبلی حلقاں واسطے منعقد ہوا قانون ساز اسمبلی 2024 گا تمام انتخابات گا ووٹاں غی گنتی با رے تفصیلاً منصوبو و انتظامات کر لیا گیا ہیں تا نجے اسمبلی گا ووٹاں غی گنتی احسن طریقہ سنگ مکمل ہو سکے۔ 25 ستمبر 2024 نانہ ات مکمل ہوا ووٹینگ عمل تیں بعد اس ویلے برقی ووٹینگ مشین یعنی ای وی ایم 3 پالی حفاظتی کیپرہ غے تحت لڑکاں گا گو رنمنٹ یہا ٹر سکینڈری اسکول راجو ری مانہ سٹرانگ رومز غے اندر رکھی گئی وی ہیں۔ اس با رے تفصیل دیتاں واں ضلع چناؤ افسر راجو ری ابھشیک شرما نے مہا را نامہ نگار سنگ گل کرتاں واں اس طرح کہیو۔۔۔ ٹ۔۔

Poonch Voter

پونچھ ضلع مانہہ حالیہ اسمبلی انتخابات غے دوران پہلی بار ووٹ کھلن آلا نوجوان ووٹراں مانہہ بڑو جوش دیکھیو گیو ہے۔ تے یہ رائے دہندگان بھارتیہ چناؤ کمیشن غی طرفوں کیا گیا پولینگ انتظامات بارے بڑی تسلی غو اظہار کر رہیا ہیں۔ نوجوان ووٹر جھپڑا کہ پہلی بار جمہوری عمل مانہہ شامل ہوا ہیں۔ انہاں نے اس خطہ مانہہ احسن تے شفاف ووٹینگ نانہہ یقینی بنان بارے چناؤ کمیشن غی تعریف کی ہے۔ 18 تیں 21 بہراں غی عمر آلا یہ ووٹر پہلی بار اپنو حق رائے دہندگی استعمال کرتاں واں بڑا خوش تھا۔ تے پولینگ سٹیشناں ور بہتر سہولیات نانہہ اُجاگر کر رہیا ہیں۔ آکاشوانی سنگ بات چیت کرتاں واں پہلی بار ووٹ کھلن آلاں گا تاثرات کُجھ اس طرح تھا۔ باٹ۔۔۔

Doda Voter

ڈوڈہ ضلع غا لوکاں نے 10 بہراں گا وقفہ تیں بعد جموں کشمیر مانہہ پُر امن تے شفاف انتخابات کروان بارے بھارتیہ چناؤ کمیشن غو شکریو ادا کیو ہے۔ آکاشوانی سنگ گل بات کرتاں واں اُت گا ووٹراں نے آزادانہ و منصفانہ انتخابی عمل تے اس خاطر بہتر سہولیات مہیا کروان تے انتظامات غی تعریف کی ہے۔ اُت غا بسنیکاں نے اس گل نانہہ اہمیت سنگ کھیو ہے جے یوہ جمہوری عمل خطہ مانہہ امن تے پائیداری بارے نمایاں طور اک سنگ میل ہے۔ اس بارے بولتاں واں اک ووٹر نے اپنا تاثرات کُجھ اس طرح دتا۔۔۔ ٹ۔۔

NIA Searches

دہشت گرداں نانہہ رقومات مہیا کران گا معاملہ مانہہ جاری تحقیقات گا سلسلہ مانہہ قومی تحقیقاتی ایجنسی این آئی اے نے متی ساری جگہاں ور چھاپے ماری کی ہے۔ یاہ چھاپے ماری 5 ریاستاں تے مرکزی زیر انتظام علاقاں مانہہ گذشتہ روز کی گئی جن مانہہ جموں کشمیر، مہاراشٹر، اُترپردیش، آسام تے دہلی غا 26 مقامات شامل ہیں۔ این آئی اے نے یوپی غا میرٹھ تے سہارن پور، آسام گا گول پارہ، مہاراشٹر غا اوزلگاباز، جالنا تے مالیکانوں، جموں کشمیر غا رام بن پلوامہ تے بارمولہ تے دہلی مانہہ تلاشی کا روائی کی ہیں۔ تلاشی غے دوران این آئی اے نے کُجھ دستاویز، الیکٹرانک ڈیوائسز تے رسالہ ضبط کیا ہیں۔ اس سلسلہ مانہہ مشکوک افراد دہشت گردی نانہہ بارے دین تے نوجواناں نانہہ اُس پاسے لان مانہہ لگا واہ تھا۔ تے جیش محمد دہشت گرد تنظیم تیں متاثر تھا۔

Snowfall

جموں کشمیر غا مشہور پہاڑی سیاحتی مقام گلمرگ مانہہ تازی برفباری ہوئی ہے۔
بیتی رات بالائی علاقوں مانہہ 2 تیں 3 انچ برفباری گلمرگ غے نال نال سنتھن ٹاپ
مانہہ وی ہون غی خبر ہے۔ اچانک موسم مانہہ تبدیلی غی وجہ نال درجہ حرارت مانہہ
کمی درج کی گئی ہے۔ گلمرگ تے سنتھن ٹاپ آن آلا سیلانیوں غا محضوظ ہون واسطے
تازہ برفباری نے اُن مانہہ اِن مقامات ورجان غی ہور تانگ بدھا دتی ہے۔

One Nation One Election

سابق صدر رام ناتھ کویند غی قیادت آلی اعلیٰ سطحی کمیٹی نے اک ملک اک چناؤ ور
کہہوے جے ملک مانہہ اس غو نفاذ ملک واسطے بہت زیا دہ فائدو مند ثابت وے گو تے
وکست بھارت آلیے پاسے اک قدم وی وے گو۔ اُنہاں نے یاہ گل نوی دہلی مانہہ بیک وقت
چناؤ ور 30 ویں لال بہادر شاستری یادگار لیکچر غے دوران کہی۔ سابق صدر نے کہہو
جے بیک وقت چناؤ غا دیرپا فائدا ہیں جن مانہہ بہتر انتظامیہ، پالیسی غی پائیداری،
اقتصادی باہدو وغیرہ شامل ہیں تے خوشحال مستقبل واسطے یاہ صلاحیت رکھے۔

Celebrated Palsy Day

دُنیا پھر مانہہ عالمی دماغی فالج بارے تہاڑو مانیو جا رہیو ہے۔ اس تہاڑو غو مقصد دماغی
فالج تیں متاثر افراد غا بُنر تے شناخت غی عزت افزائی بارے سماج مانہہ بیداری
عام کرنو تے دقیانوسی تصور نانہہ دور کرنو ہے۔ اس سال اس تہاڑو غو عنوان ہے ”یو
نیکلی سی پی“ جھپڑو اِس گل ور زور دئے جے اک شخص غی معزوریت، اُس غی
مکمل شناخت نہیں ہوتی۔ اس تہاڑو غا موقعہ ور بکھ بکھ قومی قومی سطح گاداران
تے علاقائی مرکزوں مانہہ معزور افراد نانہہ باختیار بنان غا محکمہ غے تحت پروگرام
منعقد کر غے دماغی فالج بارے ملک پھر مانہہ بیداری عام کی گئی۔ تانجے اِس نال
متاثر افراد نانہہ باختیار بنایو جا سکے۔ ان پروگراموں مانہہ دماغی فالج نال متاثر افراد غا
بُنراں، صلاحیتوں غی عزت افزائی وی کی گئی۔

IAF Air Show

بھارتی فضائیہ غی طرفوں اپنا 92 واں یوم تاسیس غی تقریبات غا سلسلہ مانہہ 72
لڑاکو جیٹ جہازوں تے بیلی کپڑوں غا شاندار مظاہرہ آلو پروگرام چنئی مانہہ شروع ہو
گیو ہے۔ اس تقریب مانہہ 15 لکھ تماشاہی راغب کرن بارے کوشش کی جا رہی ہیں۔
تانجے اس سال اِمکار ریکارڈ بُک مانہہ اک ریکارڈ بنایو جا سکے۔ سکشم، سشکت تے اتم
نربھر عوان غے تحت 21 بہراں تیں بعد یہ تقریبات منعقد ہو رہی ہیں۔ جنہاں نے مرینا
ریٹلی ساحل ور لکھاں تماشاہیاں نانہہ اپنے در راغب کیو ہے۔ بھارتی فضائیہ غا لڑاکو

جہاز چیتک، رافیل، ڈاکوٹہ، بارورڈ، میگ تے جاگور اپنی اپنی جگہاں تیں شعلہ بیانی طاقت گو مظاہرو کر رہیا ہیں۔

Cricket Women T 20

خواتین غا ٹی ٹوانٹی عالمی کپ مقابلہ مانہ اس وقت دوہٹی مانہ کھیڈیا جا رہیا مقابلہ مانہ پاکستان غی کالسریاں غی ٹیم نے گجھ چر پہلاں 7 کھلاڑیاں غا نقصان ور 17 اوراں مانہ 87 دوڑ بنا لیں تھیں۔ پاکستان غی کالسریاں غی ٹیم نے ٹاس جت غے پہلاں بلے بازی کرن غو فیصلو کیو تھو۔ اس تیں پہلاں سری لنکا کرکٹ ٹیم نانہ برا غے پاکستان غی کالسریاں غی کرکٹ ٹیم نے مقابلو جتیو ہے تے جمعے بھارتی کالسریاں غی کرکٹ ٹیم نے نیوز لینڈ خواتین کرکٹ ٹیم تیں مقابلو ہاریو ہے۔ اج اگر بھارتی ٹیم مقابلو جت جائے تاں ہر من پریت کو ر غی قیادت آلی ٹیم اپنی پہلی جت درج کرے گی۔

Men Cricket

ٹیسٹ کرکٹ غی سریز 2 صفر نال جتن تیں بعد مرداں غی بھارتی کرکٹ ٹیم اج تیں بنگلہ دیش کرکٹ ٹیم نال 3 ٹی ٹوانٹی مقابلوں غی سریز غو پہلو مقابلو کھیڈے گی۔ یوہ مقابلو اج شام 7 بجے نیو ما دھوراؤ سینڈیا کرکٹ اسٹیڈیم گوالیر مانہ کھیڈیو جائے گو۔

خاص خاص خبر اک وری پھر۔

- 1★ جموں کشمیر مانہ اسمبلی انتخابات غا ووٹاں غی گنتی با رے تیاریں زوراں ور ہیں۔ تے ات گنتی مرکزوں ور 3 پالی حفاظتی نظام عملایو گیو ہے۔
- 2★ پورا مرکزی زیر انتظام علاقہ جموں کشمیر غا ووٹر ات پُر امن تے شفاف انتخابات کروان واسطے بھارتیہ چناؤ کمیشن غو شکریو ادا کر رہیا ہیں۔
- 3★ قومی تحقیقاتی ایجنسی یعنی این آئی اے غی طرفوں دہشت گردانہ مالی معاونت معاملہ با رے جموں کشمیر سمیت پورا ملک مانہ چھاپہ ماری کی گئی ہے۔
- 4★ تے سابقہ صدر جمہوریہ رام ناتھ کویند نے کہیو ہے جے اک ملک اک چناؤ بیک وقت کروانو وکست بھارت آلے پاسے اک قدم ہے
